

Frederi Mistral

**Darriero proso
d'Armana**



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/guests/ciel/>

Proufèto Draguignan

Aquéu proufèto Draguignan, coume lou famous Nostradàmus, èro de Sant-Roumié. L'ai couneigu dins ma jouïnesso: uno espèci de tantàlori, abarbassi e soutourniéu, que vivié à sa fantasié e un pau coume un ermito.

Si gènt i'avien leïssa 'n marrit cantoun de terro, soutu la Grand-Roubino, que ié venié que de jounc. Mai, emé lou curun de la roubino e di valat, éu, à cha barioutado, l'avié caussa pacientamen e n'avié fa 'n pichot jardin. Pièi, emé de pastouïro e de massacan perdu, e de fango pèr mourtié, i'avié basti un cabanoun e se i'èro retira.

Coume vivié? Calavo tres o quatre bouïrouniero dins la roubino au founs de l'aigo, que lis escavo emé de cacalausoun blanc, e acò ié tenié d'anguïelo, que n'en fasié de sartanado emai de soupo e n'en salavo.

L'ivèr, quand èro court de pan, anavo faire quauque tour i masage e vilage ounte lou couneïssien pas. Lou capèu à la plourarello, de porto en porto demandavo em' uno saco sur l'esquino, e d'uno voues sournio e doulènto disié qu'avié 'gu de malur, que soun oustau s'èro crema, qu'avié perdu tout soun dequé, e li gènt ié dounavon. Eu apelavo acò faire *meisoun brulèio*.

Après, quand sa biasso èro pleno, proufèto Draguignan tournavo à sa cabano, rejougnié sus la cledo lou pan qu'avié bousca e, au pèd d'uno ribo, bèn abriga dóu vènt-terrau que rounflavo dins li sause, éu s'ajassavo au bon soulèu e tout soulet ié pantaiavo, de-revès sus la baucò seco.

Quand venié lou tèms di meisoun, dis iero e di semenço, que lou travai pressant se pago miés que d'abitudò, tambèn fasié quauco journado. Mai pas long-tèms. Pèr si resoun disié que "lou travai avié jamai fa 'n bèl ome".

- Arregardas li rusticaire, disié, à respèt di moussu. Li rusticaire, li vesès abasani, courba, escranca davans l'age; e li moussu, éli que fan rèn; lou mourre ié luis e soun fres e flouri coume de porc nourri de gaspo!

Draguignan, fau avoua, n'avié pas, me rapelle, trop bono reputacioun. De-fes, li païsan se plagnien que i'avien pres, quouro un luchet, quouro uno eissado, quouro un coutrié, quouro un araire. Li gendarmo fasièn lou fur, passavon vers Draguignan e, tron de noum de sort, trovavon dins sa bòri l'arairò o lou luchet rauba.

Alor i gripo-jèsus que ié fasièn la remoustranço:

- Que voulès! disié lou fautible, tout lou mounde pòu s'engana... En tournant à l'errour, l'autre vèspre, m'entravère à-n-aquéu couquin d'óutis, que manquère m'esbarja. E 'n lou vesènt tant mau rejoun, iéu l'acampère e l'estremère.

- Mai falié lou faire crida.

- Es bèn ço que pensave faire, à Sant-Roumié, dimenche, après la proumièro messo.

- Vai bèn, diras tout acò, se 'n-cop te jujon, au tribunau.

E 'm' acò moun Draguignan, lou menavon à Tarascoun e l'embarravon au Castèu. Es en fasènt ansin quàuqui passejado à l'oumbro dóu castèu dóu rèi Reinié que proufèto Draguignan avié après forço causo.

- Poudès pas vous imagina, disié 'n sourtènt de la presoun, quétis ome sciencious, quéti particulié estrui se trovon aqui embarra! Avès qui de gouapo qu'an passa touto si classo, que sabon lou Code de cor e que vous lou resounon article pèr article.

Es aqui, au castèu de Mounsegnour lou rèi Reinié, que Draguignan avié après de counèisse à l'armana, de devina li luno pèr lou biais de l'epato e de prounoustica lou tèms. Ço que , mau-grat di fracho e dos o tres coundanacioun, i'avié vau au vesinage la counsideracioun de quàuqui bràvi masié. Dóu rèsto, se quaucun, de-fes, à la famihiero, fasié quauco alusioun à sis empresounamen:

- Em' acò? ié respoundié, dequé vos dire, barbo d'ase? Lou bon Diéu, noste Segnour, lou meteguèron pas en presoun, li Jusióu!

E li mau-parlant se teïsavon.